


Khrystof Blöbel bě so w Budyšinje narodził w léce 1546 a dosta 1569 duchownsku swjeciznu. Wot teho času běše we wšelakich duchownskich službach w Budyšinje, hač bu 1594 tachant. Wot 1569 trjebaše wón Leisentrirtowu agendu (Forma germanico idiomate baptizandi) a je sebi za serbske křćenja serbske glossy abo přispomnjenja činił.

Glossy pak su tute: *Menutzsche Sitzscho* (mjenujće džěco); *počlafsche dele* (poklakće); *Spiwatzsche patzschere* (spěwajće pačerje); *Reftzsche: Ja Saprw* (rjekće: ja zapru); *hordosczä* (hordosće); *ja wirw* (druhi króc: ja wyrw, ja wěrju); *Ja Stzu* (ja cheu); *psimptze Sitza* (přimńće abo dótkńće so džěsca)!

Blöbel, kaž je widzec, njeje do žaneje českeje knižki pohladał; hewak by lěpje serbscy pisał! Zo je serbska krótká agenda, krótki katholski katechismus abo druha někajka knižka do teho časa čišćana była, sebi myslimy; ale wukhowała so nam žana njeje. Je-li pak tajka knižka była, zawěrnó Khrystof Blöbel njeje do njeje pohladał!



N e k r o l o g XIX.

Jakub Nowak,

farań w Radworju a sobustaw M. S. wot jeje załoženja.

* 3. augusta 1821. † 20. junija 1875.

Serbam, wosebje katholskim nasta njewočakowane nowe žarowanje! Zasy zemrje nam swěrný Serb, horliwy duchowny, wšudže česćowany a wot svojich bližšich znatych lubowany towařš, farań Jakub Nowak w hišće njedocpěтым 54. léce nazemskeho žiwjenja!

Njebožički narodži so 3. augusta 1821 we Wotrowje, hdžež měještaj jeho. staršej burske kubło. Wopytowaše najprjedy šulu we Wotrowje a potom w Budyšinje; hižo nazymu 1835 poda so jako serbski seminarist do Prahi, študowaše tam na małostronskim gymnasiu, a dokonja tam filosofiski a theologiski kurs. Hdyž bě 31. julija 1846 měšnisku swjeciznu dostał, bu najprjedy druhi a wot 1855 přeni kapłan při serbskej cyrkwi.